

03 NOV 2003

Mahathir-Bangladesh/I

MEDIA BANGLADESH JUGA PUJI DR MAHATHIR

Oleh: Shafiqul Bashar

DHAKA, 3 Nov (Bernama) -- Bekas Perdana Menteri Tun Dr Mahathir Mohamad turut mendapat pujian media Bangladesh kerana kepimpinan berani dan usaha gigih menyatupadukan umat Islam dan negara-negara membangun.

Sejak seminggu lepas, semua akhbar utama telah menyiarkan pelbagai rencana dan artikel mengenai Dr Mahathir dengan tumpuan utama terhadap ucapannya pada Sidang Kemuncak Pertubuhan Persidangan Islam (OIC) ke-10 di Putrajaya bulan lepas.

Kesemua empat buah stesen televisyen Bangladesh juga menyiarkan program-program mengenai Dr Mahathir dan pembangunan Malaysia sepanjang 22 tahun diterajui olehnya.

Kebanyakan akhbar terbitan Ahad menyiarkan rencana pengarang yang mengulas mengenai persaraan Dr Mahathir Jumaat lepas.

Akhbar The Daily Star menyatakan "Dr Mahathir dan Malaysia begitu sinonim. Dasar-dasarnya begitu berjaya sehingga membawa negara ke tahap pembangunan yang cemerlang".

Akhbar The News Today pula dalam rencana bertajuk "Legasi Mahathir" menyatakan "Malaysia bukan bersendirian mewarisi legasi Mahathir Mohamad, ia akan menjadi contoh inspirasi kepada yang lain."

Akhbar itu turut memuji pendirian tegas Dr Mahathir terhadap dasar imperialisme Barat.

"Dr Mahathir bukan bin Laden atau Saddam; tetapi dia tetap menyakiti negara-negara Barat dengan keberaniannya menyuarakan kebenaran dengan lantang," kata akhbar itu.

Beberapa akhbar lain yang menyiarkan rencana pengarang tentang persaraan Dr Mahathir ialah The Independent, New Age serta akhbar-akhbar bahasa Benggali Janakantha (Suara Rakyat) dan Jugantar.

Janakantha menyifatkan Dr Mahathir dan Malaysia sebagai sahabat karib Bangladesh.

Akhbar harian tertua Bangladesh, The Ittefaq dalam rencana muka depannya menyifatkan Dr Mahathir sebagai pemimpin besar Asia dan memuji peranannya menentang keganasan dan fundamentalisme agama.

-- BERNAMA

SHB AHH MOZ